

**■ GLOSSA**

# Parcs, parcs dovra il pajais!

DA SILVIO CAMENISCH

**N**a savain nus betg pli tge entschaiver en cun noss temp, faschain nus in parc. Nus faschain mintg'emna in parc, dus parcs, trais parcs, nus ans laschain provocar. Ans essan nus culpants, quai è gist. Pon ils collegas scrivent Theo e Leo (jau na sun betg: scrivent, fa nagut) scriver encunter manieraivel u main sco ch'i vulan, na gida nagut. Parcs, parcs dovra il pajais!

**N**us lain parcs. Nua che nus n'avain betg els lessan nus avair, en mintga cas. Weil wir es uns wert sind. Per noss turists da qua e da là. Na fiss ussa betg manieraivel e bel, na pudessan nus betg accompagnar e manar nossas turistas en noss parcs, noss curtins da l'amicizia, qua mussar il bel, das Schöne. Il malgtiert na mussain nus betg, na mussain nus betg.

**Q**uest nov quartier en il quartier, sin giaschom e dretg possess da dretgs burgais, dovra in parc. In bel parc valitescha si fitg il quartier. Senza in bel parc na fiss il quartier ussa betg bel. Realisain nus gugent. Nus essan uss il president dals burgais. Il president dals burgais essan nus uss. Auters fissan er gugent, ma quel dain nus betg nà! Il plaz central dal parc ed en il parc e tras il



parc duai avair in di noss num. Duraivel.

**Q**ua, enturn noss mausoleum da famiglia en charplina, lessan nus in parc. Lieu ferm da cult ed aduraziun. La natira, territori d'ogna, uschè unica e bella. In parc stuess nà. Tgi spendess ina bella spenda per noss parc? Da gudar bels premis: perduns cumplains e la vita perpetna. Na, na. La chaplutta amez il parc na dastgas betg fotografar u filmar. Nagins selfies lubids, ni da tai persul ni cun auters ed autras! Vi qua, là, èn noss kioscs plain devoziunalias da kitsch, survegnn tut da cumprar, la saira, cur ch'il di va da rendì er en il parc. Ta na manca nagut. Turnas a chasa tancà si plain. È stà tes di.

**T**uts lieus da tuts festivals culturals d'origin na lessan nus betg mo avair

perpetnità en cudeschs fotografics annuals. Nus lessan enserrar tut ils lieus en in mega parc d'origin, approvà e finanzià da durada, jau manegel a semper, dal chantun. Pudess noss advocat e chau politic da la chasa, il chastè, la firma, tge che vus lais, stuschar tras quai en num da la famiglia engrondida cun milliuns simpatisants, fautors, amis, plugs? Grazia. Plaz en tschiel sin segir.

**N**us lessan, ussa, finalmain in parc per Rumantschs da buna voluntad. E betg tuts èn da buna voluntad, che la confessan cun sa radunar: per commemorar, engraziar, stimular e turnar. Auters numassan quai in chantun da/per Rumantschs. In uschenumnà «parc» avess meglras schanzas da vegnir realisà en curt temp. Chantuns avain nus avunda, ma betg parcs. In parc cun Rumantschs, per Rumantschs e sur da Rumantschs, sco ditg: da buna voluntad e buna qualitat, da mendra na duvrain nus betg, manca uss anc.

**D**ieu e Signur, igl è temp, baud atun! Tgi che n'ha betg ussa ses parc, n'ha betg uschè spert in! Scriva lungas brevs da recumandaziun e curra da lieu a lieu tras las instanzas, cura che la feglia croda, è fraid, e ch'auters èn sin la vart segira, han parca en a chaud.